

Liuz Ma'neih daj iq bohmei couh dai lo, ndaw ranz gungzhoj raixcaix. De maj ndaej youh daemq youh ndaem youh yakyawj, 40 geij bi le lij caengz aeu ndaej yah.

Luz Yenz daj iq couh yawj mbouj hwnj Liuz Ma'neih, mboujdanh roxnyinh de vunz maj ndaej yakyawj, caiqlix lij roxnyinh de huk lai. Daj Luz Yenz roxsoq hwnj, Liuz Ma'neih couh mbouj dingz mbouj duenh heuh vunz ra mehyah hawj de, cienz sai bae mbouj noix, mehyah cix gangj mbouj baenz saek dah.

Mbwn yaek loengh vunz, danghnaeuz gangj Liuz Ma'neih dwg aenvih yienghsiengq guhgvaicq caeuq gyaranz gungzhoj aeu mbouj ndaej yah, Luz Yenz couh dwg miz cingz deng fouz cingz sieng, sau lengj mingh yak lai lo. Luz Yenz maj ndaej gyaundeih, caenhguenji yienghneix, de youq gamjcingz fuengmienh cix dwg lumj saejgaeq ngutngut ngeujngeuj nei, mbouj miz baez he swnhleih gvaq. Mwh song vunz cingznaek sim laeg doxgyaez ndaej cingq naemq seiz, mbouj dwg miz gij saeh neix couh dwg gij saeh haenx daeuj nyaux loengh, doeklaeng sanq doeng sanq sae gag vunz gag deuz. Gamjcingz saeteiq hawj Luz Yenz doeknaicq raixcaix, miz seiz de roxnyinh diuz loh seiqvunz dauqcawq dwg hongx.

Liuz Ma'neih bingzseiz mboujguenji miz saeh fouz saeh cungj gyaenz ranz Luz Yenz baenq bae baenq dauq, naeuz de najsaeck mbouj ndeiyawj, byom ndaej lumj duzmeuz bingh nei di cingsaenz he hix mbouj miz. Lij naeuz de miz cungj danyw he, danghnaeuz mehmbwk gwn le aen dungx couh soeng lo, gwn maz cungj rangdiemz, vunz couh maj ndaej youh biz youh hau, mehmbwk gungq daengj aek hung cij ndeiyawj.

Moix baez dingqny Liuz Ma'neih myaiz sinzfoedfoed gangj gij vah neix seiz, Luz Yenz couh hozndat ndaej sing hung hat de. Liuz Ma'neih dingq le hix mbouj ndatheiq, lij

ciuqyiengh riuhehe dwk, hawj Luz Yenz dawz de mbouj miz saekdi banhfap.

Yienznaeuz bingzseiz Luz Yenz gig haemz Liuz Ma'neih, hoeng miz seiz hix lij aeu de daeuj bang. Daxboh Luz Yenz gvaqseiq caeux, ndaw ranz mbouj miz bouxsai, lumj rienghmou vaih roxnaeuz densen goengq gij saeh neix, daxmeh Luz Yenz couh ra Liuz Ma'neih daeuj coih. Lumjbaenz hix cij miz Liuz Ma'neih cij miz hoengq daeuj bang, ndaw mbanj gij hauxseng nyumx gyaenjnding gyaenjhenj haenx mbouj dwg daengx ngoenz baij daiz ndoet laeuj couh dwg youz gyok guhdoj. Moix baez Liuz Ma'neih cungj dwg angqvauvau daeuj bang, yiemq vunz cingzngieih, doeklaeng Liuz Ma'neih caiq gangj gij vahbemx, Luz Yenz couh lumj dingq mbouj nyi nei, mbouj dap hix mbouj han.

Liuz Ma'neih bingzseiz cawz le dajleix geij moux reih ranz swheij, ndaejhoengq seiz hix bae guh di seng'eicq iq. Lumjbaenz sou huqrwix, saz haeuxyangz caeuq buenq haeux buenq duh daengjdaengj. Luz Yenz gyaenz gwn haeuxyangz saz, miz baez he de caeuq Cunhmei bae caeuq Liuz Ma'neih cawx haeuxyangz saz, gij feiz ndaw loz ingj faj naj gyaundeih de hoengzmaeq. Liuz Ma'neih haenx naeuz: "Luz Yenz, mwngz maj ndaej caen ndeiyawj, danghnaeuz ciuh neix gou aeu ndaej yah lumj mwngz

baenzneix couh ndei lo."

Luz Yenz dingq le cix dauq baeh naeuz: "Mwngz siengj ndaej ndei, mehmbwk doxliz gvaq hix yawj mbouj hwnj mwngz ne!" Luz Yenz ndawsim naemj: Liuz Ma'neih mwngz hix mbouj ok nyouh ciuq swheij baez ndeu, dahsau lawz yawj hwnj mwngz, gij yienghsiengq mwngz hwk ndaej vunz ngaiz cungj gwn mbouj roengz hoz lo. Yienznaeuz gou caengz haq ndaej ok, hoeng couh suenq caeuq 10 daegsai mbouj baenz hix yawj mbouj hwnj mwngz cungj vunz neix. Hw, caen dwg gungqsou siengj gwn noh hanqmbwn!

Ndwenngoenz lumj raemx lae buetbongh baenaj, Luz Yenz lij caengz miz dieg, baez yaep da couh yaek 30 bi lo lij boux vunz dog ndwi.

Liuz Ma'neih caeuq mehyah doxliz daiq miz daeglwg he doxaeu lo. Mehmbwk haenx caeuq Liuz Ma'neih doxdoengz, mboujdanh maj ndaej daemq youh yakyawj, caiqlix beizheiq hix gig cuet, song vunz ciengzciengz vih gij saeh saepsoiq doxceng mbouj dingz. Miz baez he, mehmbwk haenx moeb Liuz Ma'neih ndaeng ndaem da foeg, ninz youq gwnz mbonq gyangzhwhw. Moix baez doxceng sat, mehmbwk haenx couh buet ma ranzdaiq. Mbouj miz banhfap, Liuz Ma'neih cijndei sing'unq bae gouz de dauq ranz. Yawj gij yiengh mehmbwk daekeiq fwgfwg, Luz Yenz roxnyinh Liuz Ma'neih dwghaemz

youh hojlien.

Doeklaeng Liuz Ma'neih yied nyaenxheiq, mehmbwk haenx yied guh yied haenq, lij luenh son daeglwg de dem. Hainduj lwg haenx yienznaeuz mbouj heuh Liuz Ma'neih guh daxboh, lijdwg gig roxsoq "daxau daxau" heuh dwk, doeklaeng maz cungj mbouj heuh lo. Ceiq hawj vunz simcit dwg mehmbwk haenx yaeh Liuz Ma'neih gai 2 duz cwz hung caeuq 10 duz mou hung sat, dawz cienz cienzbouh oet haeuj daeh swheij bae liux, couh fannaj caeuq Liuz Ma'neih doxliz, daiq daeglwg deuz lo.

Liuz Ma'neih doxliz le, doiq maz cungj roxnyinh doeknaicq, reihnaz mbouj miz sim bae guenji, doeklaeng ndaw reihnaz maj rim hazrum. Hix mbouj miz simcingz bae guh gij seng'eicq iq lo, moix ngoenz ninz daengz daengngoenz dak caekhaex cij gikgyakgyak hwnqdaej.

Liuz Ma'neih lij dwg gig gyaenz bae ranz Luz Yenz caeuq de gangj goj. Liuz Ma'neih baez raen Luz Yenz couh mbe bak riuhehe, mbouj caiq gangj vahbemx gik de. Liuz Ma'neih mizeiq depgaenh, Luz Yenz hix dwg maij dam mbouj dam. Liuz Ma'neih miz seiz cijndei najnyaenq dwk lizhai. Gvaq le song sam ngoenz de youh daeuj lo, baenzneix fanfoek geij baez, seizgan nanz le, Luz Yenz dauq hix gvenq lo.

(caengz sat)



Miz ngoenz he, bouxvunz coengmingz ndeu bae baiq baed, gouz baed baujyouh aen mbanj de daengx bi 365 ngoenz bouxboux ndang cangq ndok gaenj, mbouj baenz maz bingh.

Baed naeuz: "Gij yauhgiuz mwngz daiq lai lo, ceiq lai ndaej 4 ngoenz ndwi! Mwngz senj 4 ngoenz lawz?" Bouxvunz coengmingz dap naeuz: "Yienghneix gou couh senj ngoenz seizcin, ngoenz seizzah, ngoenz seizcou caeuq ngoenz seizdoeng ba."

Baed baez dingq, ndawsim ngeix: Gangj dwg 4 ngoenz, gizsaed ciuq coenz vah de hawj de, gaenq dwg daengx bi lo. Baed doq naeuz: "Baezneix mbouj suenq, mbouj ndaej hawj mwngz 4 ngoenz lo, ceiq lai hawj mwngz 3 ngoenz, mwngz senj

3 ngoenz lawz?" Bouxvunz coengmingz mbouj guenji mbouj gip dwk naeuz: "Baenzneix gou couh senj ngoenzlwenz, ngoenzneix caeuq ngoenzcog."

Baed baez dingq, ndawsim ngeix: Bouxvunz neix caen dwg coengmingz raeuh, siuj ngoenz he, de hix rox aeu ndaej daengx bi. Baed ngauz gyaenj naeuz: "Baezneix hix mbouj suenq, mbouj ndaej hawj mwngz 3 ngoenz lo, ceiq lai hawj 2 ngoenz, mwngz vaiq senj ba!" Bouxvunz coengmingz riu dwk naeuz: "Yienghneix gou couh senj ngoenzrongh caeuq ngoenzlaep 2 ngoenz neix."

Baed naeuz: "Baezneix hix mbouj suenq, ceiq lai hawj mwngz ngoenz ndeu!" Bouxvunz coengmingz naeuz: "Baenzneix gou couh senj moix it ngoenz ba!"

Baed raen baenzlawz gangj cungj nanz mbouj ndaej bouxvunz coengmingz neix, ndawsim gaenq amq boiqfug de, caemhcai gij vah gangj okbae youh mbouj ndaej myonx, cungj mbouj ndaej gangj ngoenz ndeu hix mbouj hawj de ba? Doeklaeng cijndei dapwngq lo.

Vunzmbanj bouxvunz coengmingz itcig ndangdaej cangqrwd, gaenx guh mbaet yungh, ndwenngoenz gvaq ndaej diemzswdswd.



Raemxdiuqdat lumj baengzhau venj bangxdad.

Yizmingz ingj